

## Prome Minister a pasa man pa ministerionan di Endy Croes

**NA** Hulandes tin un dicho cu ta bisa: “het kan verkeren” y esey ta e unico forma cu por splica e decision di dialuna di Prome Minister demisionario, Evelyn Wever Croes, di pasa man pa e ministerionan di deporte y enseñansa cualnan tabata bou di responsabilidad di ex Minister Endy Croes.

Asina cu Su Excelencia Gobernador Alfonso Boekhoudt a ratifica e decision di Parlamento pa baha Endy Croes como Minister siman pasa, Prome Minister a dicidi cu lo bay responsabilisa su mes cu e dos ministerionan aki, pa loke ta resta e periodo di gobernacion di su di dos gabinete.

Rocco Tjon un siman prome a ser asigna pa tuma over e ministerionan di Glenbert Croes ora cu el a wordo informa di ta sospechoso principal den e caso Portulaca pero e situacion cu ministerio di Endy Croes ta algo totalmente diferente.

Ta un hecho cu den henter e problema cu ex minister Endy Croes, e homber Kenneth Vrolijk kende tabata ex director di SSSA y tambe ex coordinador di Endy, ta yiu di criansa di Prome Minister Evelyn loke sin duda a converti henter e decision aki, di ta uno di conflicto di interes hopi serio.

Premier demisionario kier of no kier, ta hunga un rol den henter e desaroyo aki, e tin un interes familiar den henter e scandal aki y

pa tal motibo corectamente for di momento cu e decision a bira conoci, e asunto aki a bira un topico di combersacion practicamente tur caminda. Pa un gobierno y sigur un Prome Minister cu semper tin e palabra integridad den su vocabulario, ta critica rivalnan politico di a brasa corrupcion, e decision tuma ayera mainta ta uno sumamente cuestionabel.

No solamente esey pero ni un siman despues cu Parlamento a haya cu tabatin suficiente indicacion cu ex minister Endy Croes ta involvi den desaroyonan no bon na SSSA, caminda Kenneth Vrolijk tabata su coordinado, e mesun Prome Minister y lider di partido MEP, a dicidi di promove e ex mandatario caminda Endy a bira candidato number 4 riba e lista geel, reemplasando Glenbert Croes kende a dicidi di entrega su retiro como minister pero tambe como miembro di partido MEP.

Ta cosnan cu a lanta hopi pregunta y cuestionamento di e intencionnan aki di e Prome Minister, ya cu a spera cu lo a pasa e carteranan aki pa otro miembro di e gabinete pero awor ta habri posibilidad cu su persona lo por tin influencia den henter e proceso di investigacion.

Hasta ta papia di e posibilidad cu e propio Endy lo por sigui atende tur cos di su cartera ya cu te cu ayera e no a entrega auto di gobierno y tampoco su celularnan.

## Prome Minister di Aruba lo asumi e cartera di enseñansa y deporte banda di su cartera existente

**DIALUNA** mainta 21 di october durante Conferencia di Prensa di Gobierno di Aruba, Prome Minister Evelyn Wever-Croes a elabora riba e cartera di Deporte y Enseñansa.

Prome Minister ta splica cu despues cu Minister di Enseñansa y Deporte, señor Endy Croes a entrega su retiro, e proceso a encamina y Gobernador a acepta e retiro di Minister Endy Croes.

Gobierno a reuni den nan seno y yega n’e decision cu Prome Minister di Aruba lo asumi e cartera di Enseñansa y Deporte banda di su cartera existente como Minister di Asunto General, Innovacion, Organizacion Gubernamental, Infraestructura y Planificacion Teritorial p’e periodo demisionario di Gabinete Wever-Croes y lo continua cu e cartera di ex-Minister Endy Croes pa asuntonan coriente.

Lo pone enfasis pa trece tranquilidad bek den enseñansa y den deporte y sigui enfoca riba e reforma y e cambionan andando. Tambe lo sigui duna atencion n’esnan involvi den e cambionan entre otro docente y alumnonan.



*“Lo mi reuni cu tur director y schoolbestuur den e siguiente dianan pa tin un miho bista y por continua cu e trabou p’e periodo demisionario. Mi ta compromete mi mes cu e pueblo pa percura pa nada tranca y tur proceso sigui den e rumbo positivo cu Aruba ta bayendo aworaki. Lo mi haci tur mi esfuerso pa trece e tranquilidad bek specialmente pa nos mucha y hobennan cu ta bay scol y cu ta practica deporte no mester sinti niun efecto negativo cu parlamento a ocasiona recientemente”,* Prome Minister a enfatisa.